

ALAHADY FAHA-6 MANDAVANTAONA D



ANDRIAMANITRA NO TENA MAHASAMBA IRA FA TSY NY HAREN'NY TANY

Ry Kristianina havana, amin'izao Alahady mandavantaona tsotra fandalinam-pinoana ataontsika izao dia nibanjina manokana ny fiantsoan'Andriamanitra isika tamin'ny alahady lasa teo, nirahin'Andriamanitra isika ho mpanarato olona tahaka an'i Simona Piera, nirahina mba hamokatra tokoa isika raha miara-miasa amin'izy Andriamanitra. Raha manao ny asan'Andriamanitra isika dia Andriamanitra no hanao ny asantsika. Izany ny "vocation" dia ny fanatanterahana ny sitrak'Andriamanitra. Nilaza tamintsika I Jesoa tamin'ny Alahady lasa faha-5 mandavantaona teo "Alatsaho ny harato mirosoa amin'ny lalindalina kokoa". Amin'izao Alahady faha-6 mandavantaona izao dia manasa antsika tokoa ireo vakiteny arosan'ny Eglizy mba hiroso lalindalina kokoa isika eo anivon'ny fiainantsika satria irahina isika hikatsaka ny hasambarana. Vao tsy ela ny papa nanoratra

ny "exhortation apostolique" momba ny fiantsoana ho amin'ny fahamasinana, ho amin'ny hafaliana, ho amin'ny fiadanana. Lazain'ny Papa fa làlana tokoa mankany amin'ny fahamasinana ny fanatanterahana ny sitrapon'Andriamanitra satria masina izay miombona amin'ilay masina dia Andriamanitra, làlana mankany amin'ny fahamasinana sy fahasambarana no niantsoana

Vakiteny I Jer. 17, 5-8

Tononkira : Salamo 1

Vakiteny II : 1 Kôr. 15, 12. 16-20

Evanjely : Lk. 6, 17. 20-26

antsika. Ilay toriteny nataon'i Jesoa tao an-tendrombohitra voalaza amin'ny Evanjely nosoratan'i Md Matio no nataon'i Papa ho foto-pampianarana, fa izao Alahady faha-6 izao dia ny Evanjelin'i Md Lioka no vakina amintsika satria taona D dia I Md Lioka no Evanjelista handalinantsika ny finoantsika ka hahafahantsika mivelona ny finoantsika, mankalaza ny finoantsika, mandray an-tànana ny finoantsika sy mizara azy amin'ny hafa. Antintranterin'ny vakiteny androany fa ny tena hasambarana dia ao amin'Andriamanitra irery ihany, tsy misy harena mitondra amin'ny tena hasambarana sy fiadanana raha tsy ao amin'Andriamanitra. Voalazan'i Jeremia mpaminany ao amin'ny vakiteny

voalohany “ *Ho voahozona izay olona mitodika amin’olombelona, ho soavina kosa mitoky amin’Andriamanitra*” Izany tokoa isika olombelona miovaova, izao tontolo izao mamitaka. Fantantsika fa korontana vokatry ny fifangaroan-javatra no atolotr’izao tontolo izao. Izany no mahatonga antsika ho voahozona raha mifikitra amin’izao tontolo izao fa raha mifikitra amin’Andriamanitra dia tsy hiova izy, izany ny maha Andriamanitra azy. Hanatra ho antsika izany, raha te ho génération mpanorina isika dia aoka hanorina amin’ny zavatra mari-pototra mba tsy ho voahozongozona ny fiainantsika, Andriamanitra irery no tsy miova. Nilaza koa I Jeremia “*Manahaka ny anjavidy eny an-tany lava volo izy, ary rehefa misy hasambarana tonga, tsy ifaliany; honina amin’ny tany karankaina any an’efitra, any amin’ny tany sira, tsy misy mponina! Hohasoavina ny olona mitoky amin’ny Tompo, sy manantena ny Tompo ho tokiny! Manahaka ny hazo nambolena eo amoron-drano Izy, mandatsaka ny vahany mankany amin’ny rano mandeha; tsy matahotra rehefa tonga ny hainandro, sady maitso ravina mandrakariva; tsy manahy izay taona fahamainana izy, ary tsy mitsahatra ny mamoa.*”

Izany tokoa ny tsodranon’Andriamanitra ho an’izay mifikitra aminy ary mahazo ny fiadanana mandrakizay. Ny lalana mankany amin’ny hasambarana no ambaran’I Jesoa amin’ny Evanjely raha namory ny olona marobe nanaraka azy izy. Matoa ny olona manaraka ny Tompo dia mba te hahita sy hiaina ny hasambarana, tsy misy olona tsy mikasaka hasambarana, samy te ho sambatra ny olona jiaby.

Raha fintinina ny fampianaran’I Jesoa dia tsy hoe ny fananana zavatra rehetra izao no hasambarana fa miankina ny maha anao anao, ka raha ny toetranao mifanaraka amin’ny sitrak’andriamanitra dia sambatra ianao. Izany nodikan’ireo hasambarana ampianarin’I Jesoa amintsika androany. Inona no ambarany raha milaza izy fa sambatra ny mahantra, ary loza ho an’ny mpanankarena, tsy ny harena no ratsy fa rehefa izy no tompoina sy Andriamanitra dia mikorontana ny fiainantsika, tsy mahita fiadanana isika. Tsy ny fahantrana no tsara, tsy miantso amin’ny fahantrana Andriamanitra raha nahary antsika, fa napetrany tao amin’ny sahan’I Edena mba hanana ny rehetra. Tsy ny fahantrana no tadiavina eto fa ny toetranao mahantra, izany hoe mitoky amin’Andriamanitra satria izy no loharano sy ny fototry ny harena rehetra hanananao ary haterinao aminy ho fanasoavana ny hafa, izany no fahafoizana izay midika fahantrana eto, izany no toetra tian’i Jesoa ananantsika.

Sambatra ny noana fa loza kosa ho an’izay voky, sanatria tsy miantso hanoanana Andriamanitra fa indrindra amin’izao andro sarotra izao, fa ilay hanohanana, toetra mikatsaka ny fahamarinana, noana ny fitiavana ny fampanjakana ny rariny sy ny hitsiny, ilay hanohanana mikatsaka mandrakariva amin’izay fanasoavana ny hafa. Io ilay hanohanana iantsoan’I Jesoa ny fijoroana amin’ny hanoanana izany no lalana mankany hasambarana ho anao sy ho an’ny manodidina. Fa raha voky fitapitaka sy fialonana dia izay no loza. Raha te ho sambatra isika amin’izao androntsika izao dia aoka isika ho noana ny fahamarinana.

Sambatra ireo mitomany, tsy ny fitomaniana no tadiavana eto fa ilay fitomaniana mikatsaka ny rariny hatrany.

Sambatra raha hankalain’ny olona ianareo fa ho lehibe ny valisoa, tsy mikatsaka ny fankahalana sanatria fa fijoroana ho vavolombelona no takina amintsika. Izany fijoroana izany no manelingelina

ny hafa, izany tokoa I Jesoa, nanelingelina ny mpiara-belona izy ilay mpampianatra sy tompontsika nefa tsy voahozongozona àry fantantsika fa nandresy izy.

Aoka isika araky ny fampianaran'I Md Paoly ao amin'ny vakiteny faharoa "*Aoka isika hijoro ho vavolombelon'ny fitsanganan-ko velona*", mahatonga antsika mifikitra amin'ireo fampianaran'I Jesoa dia satria velona miaraka amintsika Andriamanitra. Averimberintsika matetika fa izay no maha samihafa ny finoantsika. Ny finoana hafa dia tsy eo anivony I Jesoa fa ny finoantsika dia I Jesoa velona no eo anivontsika. Izany no mahatonga antsika miatrika an'ireo izay mety hanilikilika antsika noho izany finoana izany, tsy hoe hiady amin'izy ireo isika fa manambara ny finoantsika, araka ny lazaintsika katolika aho ka ambarako sy iainako ny finoako. Izany no mitondra amin'ny hasambarana tsy hoe nofinofy izany hasambarana ambaran'I Jesoa izany, tsy hoe "opium du people" araky ny fitenin'ireo manam-pahaizana, tsy nofinofy ny fivavahantsika satria nandresy ny ratsy I Jesoa.

Mety manontany isika aiza ary ireo hasambarana ireo ? tsy hitanay izay tokony atao. Raha ny hamafin'izao tontolo izao dia resy isika fa mahatoky isika raha mampanjaka ny marina isika Kristianina rehetra sy vita batemy rehetra no manambara ny fifankatiavana dia handresy ny ratsy ary izany no maha génération mpanorina antsika, Eglizy OLona Velona isika velomin'ny finoana an'I Jesoa nandresy sy nitsangan-ko velona. Eo anivontsika I Jesoa olona miara belona amintsika Izy ka izany no afahantsika miaina tahaka Azy ka maniraka antsika mikatroka anatin'ireo vaomiera rafitra misy eo anivontsika indrindra ny vaomiera sosialy ho entintsika hanapotehana ny ratsy rehetra misy eo anivon'ny tontolo iainana, sy tontolom-piainana ary ny tontolom-pinoana fa manorina kosa isika Eglizy Tranon'Andriamanitra izay tontolo sy zava-boahary velomintsika, tontolom-piainana hanjakan'ny rariny sy ny hitsiny ka hifampizarantsika amin'ny alalan'ny Caritas, Justice et Paix, ny diosezy maintso, mampijoro koa ny tontolom-pinoana ka ankalazantsika ny voninahitr'Andriamanitra tsy amin'ny hira fotsiny fa amin'ny fiainantsika manontolo, ny litorjia dia ilay eokaristia hivelomantsika amin'ny fiainantsika manonntolo. Izany no hasambarana ka horaisintsika an-tàanana tokoa ny fiainantsika hahatonga antsika ho Kristy mpiara belona amin'olona.

Ry Jesoa Kristy Tompo ô, nampianarinao anay ny làlana mankany amin'ny hasambarana, tsapanay fa tsy hoe fananana an'izao na fanaovana an'izao no hasambarana fa ny fiainanay ao aminao, ny toetranay, ny fanatanterahanay ny sitrak'Andriamanitra ka ampianaro izahay hampijoro izany finoana velona izany ho zary EOY tokoa izahay ka hizara ny hasambarana marina izany.

Enga anie ampieritreritra izao tontolo izao ireo teninao ary izahay amin'ny fiainanay hanaitra izao tontolo izao, ka hifampizara tokoa an'ireo hasambarana ireo hahatonga anay tokoa ho génération mpanorina ny tontolo iainana vaovao, mpanorina ny tontolom-piainana vaovao hanjakan'ny rariny sy ny hitsiny ary ny fifankatiavana. Ny tontolom-pinoana hiderana sy hihirana ny voninahitr'Andriamanitra. Amen

Mompera Arsevka Benjamin Ramaroson